

[Augsburg], 5. März 1562

An Johannes Oporinus

UB Basel, Fr. Gr. I 11, fol. 249r.  
Steinmann Nr. 740.

S. Quod scribam non habeo, quod ad tres meas epistolas nullum abs te responsum accepi, εἴτε δι’ ἀπιστίαν εἴτε δι’ ἀτυχίαν. καίτοι μεγίστη ἀτυχιῶν ἐστὶν τὸ ἀπίστον οἵς πιστεύειν ἀνάγκη. Te scio non ita superbū esse, vt si aut meas accepisses, aut rescribendi occasionem habuisses, Wolfium quamuis Acherunticum καὶ εἰς μηδὲν ἵσως ἔτι σοὶ χρήσιμον responso non dignareris. Vbi autem ex te intellexero, quid de Gregora, quid de Epicteto fiat: scribendi mihi argumentum suppeditaueris. Ego qua potui fide et diligentia curauī, quae te velle sciebam omnia. ἀλλὰ τὸ κατορθοῦν οὐκ ἐν τῇ πράξει ἀλλ’ ἐν τῇ προαιρέσει ἐστὶ. Benignè responsum fuit, si promissa non apparuerunt, mirabor. De Isocrate recudendo si cogitas, quaeso te ne opus inchoes ante meas castigationes acceptas. Nam hic quintum iam annum eundem autorem praelegens, quaedam accuratius expendi. et vt minor sit libri moles, praefationes omnes et crimina καὶ πάντα τὰ πάρεργα praetermitti velim, et scholia in loca obscuriora substitui breuia, sed erudita, modò absoluendi spes esset. Nam subinde et negocijs et valetudine impediōr. Conuersionem quidem emendatiōrem omnium lucubrationum mearum vt habeas breui, curabo, nisi me subitus casus abripuerit. Meum enim philosophiae studium ab emendatione lucubrationum mearum mihi auspicandum esse duxi, et nunc in eo vno sum, quatenus sum meus. Mitto tibi carmen Moibani in Epictetum. Mitto et Dornschwami literas, si quando fortasse tu aliquid inde tibi vel in praefatione aliqua vel in fine Byzantinae historiae decerpendum censueris. Accepi superiorib[us] nondinis praeter libros a te excusos Hippocratem Graecum et Lambini Horatium, pro quibus tibi μετ’ εὐχαριστίας 2. ducatos mitto. Vale. 5 Martij 1562.

Hiero[nymus] Wolfius T[uus].

Si quod habes reliquum graecolatini Isocratis, et recogniti Demosthenis exemplum, vt mittas oro, quò expeditior mihi sit correctio, tibi impressio. Soluam quanti erunt.

Reiffenstein adhuc nescio vbi terrarum vagatur. 2 Cuspiniani codices in eius redditum asseruo. vnum Io[anni] Iacobo Fuggero obtuli statim. Ἔρρωσο καὶ χαῖρε, τό γε νῦν ἔχον, οὐκ ὀπωρινὸς ἀλλ’ ἔαρινὸς, εἰς τὴν πατρίδα πολύχρυσός τε καὶ μεγαλόψυχος ἀνακάμψων.

Vermerk Wolfs auf der Rückseite:

Literas ad Ramum, si potes, vt cures, oro. Poteris autem, vt opinor, per &lt;Ia&gt;cobum de Puys.